

人壽金鑑

人壽金鑑卷第八

安東程得齡與九氏輯

十四歲

左傳曰逆周子

晉悼公周

於京師而立之生十四年矣

家語曰曾子十四歲嘗出薪於野有客至母以手搯其背曾子心動棄薪馳歸問母無恙乎母曰有客至故搯臂以呼汝耳

漢書曰金日磾字翁叔本匈奴休屠王太子也以父不降見殺與母閼氏弟倫俱沒入宮輸黃門養馬時年十四矣久之武帝游宴見馬

師古曰方於宴游之時而召閼諸馬

後宮滿側日磾等數十人牽馬過

殿下莫不竊視至日磾獨不敢日磾長八尺二寸容貌甚嚴馬又肥好上異而問之具以本狀對上奇焉即日賜湯沐衣冠拜爲馬監遷侍中駙馬都尉光祿大夫

後漢書曰黃憲字叔度汝南慎陽人世貧賤父爲牛醫潁川荀淑至慎陽遇憲於逆旅時年十四淑竦然異之揖與語移日不能去謂憲曰子吾之師表也

魏志曰夏侯惇字元讓沛國譙人夏侯嬰之後也年十四求師就學人有辱其師者惇殺之由是以烈氣聞

又曰鍾毓字稚叔年十四爲散騎侍郎機捷談笑有父風

又注曰曹純字子和年十四而喪父與同產兄仁別居承父業富於財僮僕人客以百數純綱紀督御不失其理鄉里咸以爲能

又曰任昭先名嘏樂安博昌人年十四始學疑不再問

又曰陶謙字恭祖丹陽人少孤始以不羈聞於縣中年十四猶綴帛爲幡乘竹馬而戲邑中兒童皆隨之故蒼梧太守同縣甘

公出遇之塗見其容貌異而呼之住車與語甚悅因許妻以女
甘公夫人聞之怒曰妾聞陶家兒敖戲無度如何以女許之公
曰彼有奇表長必大成遂妻之

又曰鍾會字士季十四誦成侯易記

吳志曰劉繇長子基字敬輿年十四居繇喪盡禮故吏餽餉皆
無所受

又曰孫和字子孝慮弟也少以母王有寵見愛年十四爲置宮
衛使中書令闕澤教以書藝好學下士甚見稱述

又曰胡綜字偉則汝南固始人也少孤母將避難江東孫策領
會稽太守綜年十四爲門下循行畱吳與孫權共讀書

晉書曰王衍字夷甫年十四時在京師造僕射羊祜申陳事狀
辭甚清辯祜名德貴重而衍幼年無屈下之色眾咸異之楊駿

欲以女妻焉衍耻之遂陽狂自免武帝聞其名問戎曰夷甫當世誰比戎曰未見其比當從古人中求耳

又曰王衍妻郭性貪鄙欲令婢路上擔糞澄年十四諫郭以爲不可

又曰王導字茂宏光祿大夫覽之孫也少有風鑒識量清遠年十四陳畱高士張公見而奇之謂其從兄敦曰此兒容貌志氣將相之器也

又曰趙至字景真年十四詣洛陽游太學遇嵇康於學寫石經徘徊視之不能去而請問姓名康曰年少何以問耶曰觀君鳳器非常所以問耳康異而告之

又曰夏方字文正會稽永興人家遭疫癘父母伯叔羣從死者十三人方年十四夜則號哭晝則負土十有七載葬送得畢

又曰桑虞年十四喪父毀瘠過禮日以米百粒用糝藜藿其姊諭之曰汝毀瘠如此必至滅性滅性不孝宜自抑割虞曰藜藿雜米足以勝哀

又載記曰劉聰字元明年十四究通經史兼綜百家之言孫吳兵法靡不誦之

宋書曰宗慤字元幹南陽人兄泌娶妻始入門夜被劫慤年十四挺身拒賊賊十餘人皆披散不得入室

又曰龔祈字孟道武陵漢壽人年十四鄉黨舉爲州迎西曹不行

齊書曰垣崇祖字敬遠下邳人年十四有幹略伯父豫州刺史護之謂門宗曰此兒必大成吾門汝等不及也

梁書曰謝舉字言揚中書令覽之弟也幼好學能清言與覽齊

人壽金鑑卷八
三
名舉年十四嘗贈沈約詩爲約稱賞世人爲之語曰王有養炬謝有覽舉養炬王筠王泰小字也起家祕書郎

又曰王錫字公嘏琳之第二子也十四舉清茂除祕書郎與范陽張伯緒齊名俱爲太子舍人

又曰許懋字昭哲高陽新城人十四入太學受毛詩旦領師說晚而覆講

又曰劉孺字孝稚彭城安上里人年十四居父喪毀瘠骨立宗黨咸異之

又曰劉霽字士烜十四居父憂有至性每哭輒嘔血

又曰卞華字昭邱濟陰冤句人也晉驃騎將軍忠貞公壺六世孫父倫之給事中華幼孤貧好學年十四召補國子生通周易陳書曰吳明徹字通昭秦郡人也祖景安齊南譙太守父樹梁

右軍將軍明徹幼孤性至孝年十四感墳塋未備家貧無以取
給乃勤力耕種時天下亢旱苗稼焦枯明徹哀憤每至田中號
泣仰天自訴居數日有自田還者云苗已更生明徹疑之謂爲
給已及往田所竟如其言秋而大穫足充葬用時有伊氏者善
占墓謂其兄曰葬之日必有乘白馬逐鹿者來經墳所此是最
小孝子大貴之徵至時果有此應明徹即樹之最小子也

又曰袁憲字德章時年十四被召爲國子正言生謁祭酒到漑
漑目送之愛其神彩

又曰姚察字伯審吳興武康人也年七十四大業二年終于東
都遺命薄葬務從率儉其略曰吾在梁世當時年十四就鍾山
明慶寺尚禪師受菩薩戒自爾深悟苦空頗知回向矣

又曰謝貞字元正十四丁父艱號頓於地絕而復蘇者數矣

又曰司馬申字季和河內溫人也祖慧遠梁都水使者父元通梁尚書左民郎申蚤有風槩十四便善奕棋

又曰張譏字直言清河武城人年十四通孝經論語篤好元言受學於汝南周宏正每有新意爲先輩推服

又曰沈不害字孝和吳興武康人也祖總齊尚書祠部郎父懿梁邵陵王參軍不害幼孤而修立好學十四召補國子生舉明經累遷梁太學博士

南史曰劉孝綽字孝綽父繪齊時掌制誥孝綽時年十四常代草之父黨沈約任昉范雲等聞其名命駕造焉

魏書曰屈拔少好陰陽學世祖追思其父祖年十四以爲南部大人

又曰李騫字希義趙郡平棘人博涉經史文藻富盛年十四補

國子學生以聰達見知

又曰盧淵字伯源小名陽烏性溫雅寡欲有祖父之風敦尚學業閨門和睦襲侯爵年十四嘗詣長安將還諸相餞送者五十餘人別於渭北有相者扶風人王伯達曰諸君皆不如此盧郎雖位不副實然德聲甚盛望踰公輔

又曰劉昞字延明燉煌人年十四就博士郭瑀學時瑀弟子五百餘人通經業者八十餘有女始笄妙選良偶有心於昞遂別設一席於坐前謂諸弟子曰吾有一女年向成長欲覓一快女婿誰坐此席者吾當婚焉昞遂奮衣來坐神志肅然曰向聞先生欲求快女婿昞其人也瑀遂以女妻之

又曰李崇字繼長小名繼伯頓邱人也文成元皇后第二兄誕之子年十四召拜主文中散襲爵陳畱公鎮西大將軍

周書曰長孫澄字士亮十四從征討有策謀勇冠諸軍

又曰李賢字賢和年十四遭父喪撫訓諸弟友愛甚篤

又曰史雄字世武少勇敢膂力過人便弓馬有算略年十四從

父寧於牽屯山奉迎太祖仍從校獵弓無虛發太祖歎異

又曰呂思禮東平壽張人也年十四受學於徐遵明長於論難

諸生爲之語曰講書論易其鋒難敵

又曰蔡祐字承先年十四事母以孝聞

又曰泉仲遵少謹實涉獵經史十四爲本縣令

隋書曰蘇夔字伯尼年十四詣學與諸儒論議詞致可觀見者

莫不稱善

又曰趙熒字賢通天水西人也年十四有人伐其父墓中樹者

熒對之號慟因執送官見魏右僕射周惠達長揖不拜自述孤

苦涕泗交集惠達爲之隕涕歎息者久之

又曰柳雄亮字信誠父檜在華陽見害雄亮時年十四哀毀過禮陰有復讎之志

又曰高勣字敬德年十四爲青州刺史

又曰辛德源字孝基隴西狄道人也沈靜好學年十四解屬文又曰明克讓字宏道平原鬲人也年十四釋褐湘東王法曹參軍

又曰馮慈明字無佚信都長樂人也慈明在齊以戚屬之故年十四爲淮陽王開府參軍事

又曰孫萬壽字仙期信都武強人也年十四就阜城熊安生受五經略通大義兼博涉子史善屬文美談笑博陵李德林見而奇之

北史曰魏質字懷素年十四啟母求就徐遵明受業母以其年幼不許質遂密將一奴遠赴徐學畱書一紙置所卧牀内外見之相視悲歎

又曰長孫嵩代人也父仁昭成時爲南部大人嵩寬雅有器度昭成賜名焉年十四代父統事

又曰王慧龍太原晉陽人年十四爲沙門僧孫彬所匿因將過江津人見其行意匆匆疑爲王氏子孫彬稱爲受業者乃免

又曰趙溫子炎字叔起初苻氏亂炎爲乳母攜奔壽春年十四乃歸孝心色養飪熟之節必親調之

唐書曰鄭善果鄭州滎澤人年十四爲沂州刺史

又曰岑文本字景仁鄧州棘陽人父之象仕隋爲邯鄲令坐爲人訟不得申文本年十四詣司隸理冤辨對哀暢無所詘衆屬

目命作蓮華賦文成合臺嗟賞遂得直

又曰齊澣字洗心定州義豐人年十四見特進李嶠嶠稱有王佐才

又曰裴寂字元真蒲州桑泉人年十四補郡主簿

又曰羅士信齊州厯城人隋大業時賊王薄左才相孟讓攻齊郡通守張須陁率兵擊賊士信以執衣年十四短而悍請自効須陁疑其不勝甲少之士信怒被重甲左右韃上馬顧眄須陁許之擊賊濰水上陣纔列執長矛馳入賊營刺殺數人取一級擲之承以矛戴而行賊皆疑懼無敢亢

又曰張道源并州祁人名河以字顯年十四居父喪士人賢其孝縣令郭湛署所居曰復禮鄉至孝里

又曰裴敬彝絳州聞喜人父智周補臨黃令爲下所訟敬彝年

十四詣巡察使唐臨直枉臨奇之試命作賦賦工父罪已釋表敬彝子朝補陳王府典籤

舊五代史曰霍彥威字子重洺州曲周人也梁將霍存得之於村落間年十四從征討存憐其爽邁養爲己子

又曰高劭字子將淮南節度使駢之從子也父泰黔中觀察使唐僖宗避敵在蜀駢鎮淮南爲都統兼諸道鹽鐵使兵賦在已朝廷優假之以故劭幸而蚤官年十四遙領華州刺史

宋史曰常安民字希古邛州人年十四入太學有俊名

又曰郭守文并州太原人父暉仕漢爲護聖軍使從周祖征河中戰死守文年十四居喪哀毀周祖憐之召隸帳下

又曰石保興字光裔本名保正太祖取興宗之義改之建隆初年十四以蔭補供奉官

又曰任諒字子諒眉山人年十四即冠鄉書登高第

又曰陳君仁父膏太府少卿君仁年十四而孤以廕授鈐山尉東都事略曰陳烈年十四繼失怙恃水漿不入口者五日

遼史曰蕭酬幹貌雄偉性和易年十四尚越國公主拜駙馬都尉

金史曰訛古乃治訶子姿質魁偉年十四隸秦王宗翰軍中常

領兵前爲偵候

案金國語解訛古乃犬之有文者

又曰紇石烈良弼本名婁室年十四爲北京教授學徒常二百

人時人爲之語曰前有谷神後有婁室

案金國語解姓氏紇石烈曰高

又曰曹望之字景蕭其先臨潢人遼季移家宣德天會間以秀民子選充女直字學生年十四業成除西京教授爲元帥府書

令史

又曰元好問字裕之太原秀容人年十四從陵川郝晉卿學不事舉業淹貫經傳百家六年而業成

元史曰桉竺邇雍古氏幼鞠于外祖术要甲家訛言爲趙家因姓趙氏年十四隸皇子察合台部嘗從大獵射獲數麋有二虎突出射之皆死由是以善射名皇子深器愛之

又曰曲律無子牙牙後封康國王生六子阿沙不花最賢年十四入侍世祖世祖錫土田給奴隸

又曰朶爾直班好讀書年十四見文宗適將幸上都親閱御衣命錄于簿顧左右無能書漢字者朶爾直班引筆書之文宗喜曰世臣之家乃能知學豈易得者命爲尚衣奉御尋授工部郎中

又曰石天麟字天瑞順州人年十四入見太宗因畱宿衛天麟